

摘藻堂四庫全書薈要

子部

欽定四庫全書薈要卷一萬六百九十

子部

欽定授時通考卷二十七

穀種

豆一

黃豆

大豆

小豆

綠豆

白豆



豆黃



詩幽風七月烹葵及菽

朱註菽豆也大全濮氏曰菽豆葉謂之藿

小雅皎皎白駒食我場藿

大全華谷嚴氏曰藿豆葉用以作羹

大雅藝之荏菽荏菽旆旆

正義釋草云戎菽謂之荏菽孫炎曰大豆也此箋亦

以為大豆樊光舍人李巡郭璞皆云今以為胡豆璞  
又云春秋齊侯來獻戎捷穀梁傳曰戎菽也管子亦

云北伐山戎出冬葱及戎菽布之天下今之胡豆是也按爾雅戎菽皆為大豆注穀梁者亦以為大豆也郭璞等以戎胡俱是裔名故以戎菽為胡豆也后稷種穀不應捨中國之種而種戎國之豆即如郭言齊桓之伐山戎始布其豆種則后稷之所種者何時絕其種乎而齊桓復布之禮有戎車不可謂之胡車明戎菽正大豆也旆旆生長茂盛之貌

爾雅戎菽謂之荏菽

註即胡豆也

尚書帝命期夏火星昏中以種黍菽

春秋說題辭菽者屬也春生秋熟理通體屬也菽赤黑陰生陽大體應節小變象陽色也

春秋佐助期豆神名靈殖姓樂長七尺大目通於時節孝經援神契赤土宜菽

大戴禮記五月參則見初昏大火中大火者心也心中種黍菽糜時也



淮南子河水中濁而宜菽

博雅大豆菽也小豆荅也𦉳豆豌豆留豆也胡豆豨躩也豆角謂之莢其葉謂之藿也巴菽巴豆也

爾雅翼菽豆也其類最多故凡穀之中居其二又古人說百穀以為梁者黍稷之總名稻者漑種之總名菽者衆豆之總名三穀各二十種為六十蔬果之實助穀各二十凡為百穀然予以為穀之種類每物不下十數亦何假蔬果而後為百耶廣雅曰大豆菽也小豆荅也𦉳

豆莧豆留豆也胡豆踳躩也角謂之莢葉謂之藿巴菽

巴豆也又廣志曰種小豆一歲三熟槩甘白豆麤大可

食刺豆亦可食秬豆苗似小豆紫華可為麵生朱提建

寧胡豆有青有黃者此亦其大畧也然大豆以二月中

旬種者為上時至三四月則費子小豆以五月為上時

上伏中伏次之蓋秋而成故八月之雨謂之豆花雨呂

氏春秋曰得時之菽長莖而短足其莢二七以為族各

枝數節競葉繁實菽穀之薄者故豳風九月菽苴采荼

薪樗食我農夫菽苴穀之微者荼菜之苦者樗薪之惡者故以食農夫明俗之勤儉而民方以為樂亦猶孔子云啜菽飲水盡其歡斯之謂孝不假於物之豐也漢書曰今歲飢民貧率食半菽言軍中無糧以菽雜他穀食之亦貧乏之義也然菽於用甚多故羞藟之實饌餌粉糝皆稻米黍米所為合蒸則曰餌餅之則曰糝以其黏著故擣粉熬大豆以為表餌言饌糝言粉蓋互相足此後鄭之義先鄭則別以粉為豆屑所不同也又以為豉

楚辭曰大苦鹹酸辛甘行說者曰大苦豉也言取豉汁調以鹹酢椒薑飴蜜則辛甘之味皆發而行又以為粥說云共工氏有不才子以冬至日死為疫鬼畏赤小豆故冬至日以為粥厭之嵇康養生論云豆令人重說者以為啖豆三升則身重而行止難常食令人肥肌麤燥閩書楊泉物理論曰菽豆之總名也有黃豆白豆可食有綠豆可粉有黑豆可豉有赤豆有褐豆有藿豆有紅小豆有九月豆畚豆此外又有豌豆江豆水豆菜豆樹

豆葛豆菹豆刀豆皂莢豆虎爪豆蛾眉豆蟹眼豆蠶豆  
可入蔬品均豆也

天工開物凡菽種類之多與稻黍相等播種收穫之期  
四季相承果腹之功在人日用蓋與飲食相終始 一

種大豆有黑黃兩色下種不出清明前後黃者有五月  
黃六月爆冬黃三種五月黃收粒少而冬黃必倍之黑  
者刻期八月收凡大豆視土地肥磽耨草勤怠雨露足  
慳分收入多少凡為豉為醬為腐皆大豆中取質焉江

南又有高脚黃六月刈早稻方再種九十月收穫江西  
吉郡種法甚妙其刈稻田竟不耕墾每禾藁頭中拈豆  
三四粒以指扱之其藁凝露水以滋豆豆性充發復浸  
爛藁根以滋已生苗之後遇無雨亢乾則汲水一升以  
灌之一灌之後再耨之餘收穫甚多凡大豆入土未出  
芽時防鳩雀害毆之惟人一種綠豆圓小如珠綠豆  
必小暑方種未及小暑而種則其苗蔓延數尺結莢甚  
稀若過期至於處暑則隨時開花結莢顆粒亦少豆種

亦有二一曰摘綠莢先老者先摘人逐日而取之一曰

拔綠則至期老足竟畝拔起也凡綠豆磨澄晒乾為粉

盪片搓索食家珍貴做粉溲漿灌田甚肥凡已刈稻田

夏秋種綠豆必長接斧柄擊碎土塊發生乃多凡種綠

豆一日之內遇大雨扳土則不復生既生之後防雨水

浸疏溝澮以洩之凡耕綠豆及大豆田地耒耜欲淺不

宜深入蓋豆質根短而苗直耕土既深土塊曲壓則不

生者半矣深耕二字不可施之菽類此先農之所未發

者 一種豌豆此豆有黑斑點形圓同綠豆而大則過之其種十月下來年五月收凡樹木葉遲者其下亦可種 一種蠶豆其莢似蠶形豆粒大於大豆八月下種來年四月收兩浙桑樹之下遍環種之蓋凡物樹葉遮露則不生此豆與豌豆樹葉茂時彼已結莢而成實矣襄漢上流此豆甚多而賤果腹之功不啻黍稷也 一

種小豆赤小豆入藥有奇功白小豆

一名飯豆

當飡助嘉穀

夏至下種九月收穫種盛江淮之間

一種穠豆此豆



古者野生田間今則北土盛種成粉盪皮可敵綠豆燕  
京負販者終朝呼魯豆皮則其產必多矣 一種白菹  
豆乃沿籬蔓生者一名蛾眉豆其他豇豆虎斑豆刀豆  
與大豆中分青皮褐色之類間繁一方者猶不能盡述  
皆充蔬代穀以粒蒸民者

ノ



大豆

一名菽角白莢葉曰藿莖曰莢



齊民要術大豆爾雅曰戎菽謂之荏菽孫炎注曰戎菽

大菽也張揖廣雅曰大豆菽也小豆荅也脾豆豌豆留

豆也胡豆降豆也廣志曰種小豆一歲三熟槩甘白豆

粗大可食刺豆亦可食柎豆苗似小豆紫花可為麵生

朱提建寧大豆有黃落豆有御豆其豆角長有場豆葉

可食胡豆有青有黃者本草經云張騫使外國得胡豆

今世大豆有黑白二種及長稍牛踐之名小豆有綠赤

白三種黃高麗豆黑高麗豆燕豆脾豆大豆類也豌豆

豇豆螢豆小豆類也

雜陰陽書大豆生於槐九十日秀秀後七十日熟豆生於申壯於子長於壬老於丑死於寅惡於甲乙忌於卯午丙丁

農政全書王禎曰大豆之黑者食而充飢可備凶年豐年可備牛馬料食黃豆可作豆腐可作醬料白豆粥飯皆可拌食白黑黃三豆色異而用別皆濟世之穀也

又種大豆鋤成行壟春穴下種早者二月種四月可食

名曰梅豆。豆皆三四月種地，不宜肥。有草則削去。種黑豆三四月間種，其豆亦可作醬及馬料。

本草綱目李時珍曰：豆菽皆莢殼之總稱也。篆文菽象莢生附莖下垂之形，豆象子在莢中之形。廣雅云：大豆菽也，小豆荅也。

又別錄曰：大豆生太山平澤，九月采之。蘇頌曰：今處處種之，黑白二種入藥用，黑者緊小者為雄，用之尤佳。寇宗奭曰：大豆有綠褐黑三種，有大小兩類，大者出江浙。

湖南湖北小者生他處入藥力更佳又可礮為腐食李時珍曰大豆有黑白黃褐青斑數色黑者名烏豆可入藥及充食作豉黃者可作腐榨油造醬餘但可作腐及炒食而已皆以夏至前後下種苗高三四尺葉團有尖秋開小白花成叢結莢長寸餘經霜乃枯按呂氏春秋云得時之豆長莖短足其莢二七為族多枝數節大菽則圓小菽則團先時者必長蔓浮葉疏節小莢不實後時者必短莖疏節本虛不實又汜勝之種植書云夏至

種豆不用深耕豆花憎見日則黃爛而根焦矣如歲所宜以囊盛豆子平量埋陰地冬至後十五日發取量之最多者種焉蓋大豆保歲易得可以備凶年小豆不保歲而難得也

又黑大豆氣味甘平無毒久服令人身重

又陶弘景曰黑大豆為蘗芽生五寸長便乾之名為黃卷用之熬過服食所須李時珍曰一法壬癸日以井華水浸大豆候生芽取皮陰乾用



又李時珍曰大豆有黑青黃白斑數色惟黑者入藥而黃白豆炒食作腐造醬榨油盛為時用不可不知別其性味也

又黃大豆氣味甘溫無毒

農政全書黃豆苗今處處有之人家田園中多種苗高一二尺葉似黑豆葉而大結角比黑豆葉角稍肥大其葉味甘



小豆

一名荅 一名赤小豆 一名赤豆 一名紅豆 葉名藿



雜陰陽書考小豆生於李六十日秀秀後六十日成成後忌與大豆同

農政全書赤小豆本草舊云江淮間多種蔣今北土亦多有之苗高一二尺葉似豇豆葉微團莢開花似豆花微小淡銀褐色有腐氣故亦呼腐婢結角比綠豆角頗大角之皮角微白帶紅其豆有赤白蠶色三種

本草綱目赤小豆李時珍曰按詩云黍稷稻粱禾麻菽麥此即八穀也董仲舒註云菽是大豆有兩種小豆名

荅有三四種王楨云今之赤豆白豆綠豆螢豆皆小豆也此則入藥用赤小者也

又蘇頌曰赤小豆今江淮間多種之寇宗奭曰關西河北汴洛多食之李時珍曰此豆以緊小而赤黯色者入藥其稍大而鮮紅淡紅色者並不治病俱於夏至後下種苗科高尺許枝葉似豇豆葉微圓峭而小至秋開花似豇豆花而少淡銀褐色有腐氣結莢長二三寸比綠豆莢稍大皮色微白帶紅三青二黃時收之可煮可炒

可作粥飯餽飶餹並良也

又赤小豆氣味甘酸平無毒

又別錄曰腐婢生漢中小豆花也七月采之陰乾四十日陶弘景曰花與實異用故不同品方家不用未解何故有腐婢之名本經不言是小豆花別錄乃云未審是  
否今海邊有小樹狀如卮子莖葉多曲氣似腐臭土人呼為腐婢療瘡有效以酒漬皮服療心腹疾此當是真  
此條應入木部也蘇恭曰腐婢相承以為葛花葛花消

酒大勝而小豆全無此效當葛花為真掌禹錫曰按別本云小豆花亦有腐氣與葛花同服飲酒不醉與本經治酒病相合陶蘇二說並非甄權曰腐婢即赤小豆花也蘇頌曰海邊小樹葛花赤小豆花三物皆有腐婢之名名同物異也寇宗奭曰腐婢既在穀部豆花為是不必多辨李時珍曰葛花已見本條小豆能利小便治熱中下氣止渴與腐婢主療相同其為豆花無疑但小豆有數種甄氏藥性論獨指為赤小豆姑從之

又腐婢氣味辛平無毒



綠豆 一名植豆



農桑通訣北方唯用綠豆最多農家種之亦廣人俱作  
豆粥豆飯或作餌為炙或磨而為粉或作麵材其味甘  
而不熱頗解藥毒乃濟世之良穀也南方亦間種之

農政全書山綠豆生輝縣太行山車箱衝山野中苗莖  
似家綠豆莖微細葉比家綠豆葉狹窄鞘開白花結角  
亦瘦小其豆黯綠色味甘


本草綱目綠豆李時珍曰綠以色名也舊本作菘者非  
矣

又馬志曰綠豆圓小者佳粉作餌炙食之良大者名植  
豆苗子相似亦能下氣治霍亂也吳瑞曰有官綠油綠  
主療則一李時珍曰綠豆處處種之三四月下種苗高  
尺許葉小而有毛至秋開小花莢如赤豆莢粒粗而色  
鮮者為官綠皮薄而粉多粒小而色深者為油綠皮厚  
而粉少早種者呼為摘綠可頻摘也遲種呼為拔綠一  
拔而已北人用之甚廣可作豆粥豆飯豆酒燂食麩食  
磨而為麩瀘取粉可以作餌頓饊盪皮搓索為食中要

物以水浸濕生白芽又為菜中佳品牛馬之食亦多賴  
之真濟世之良穀也

又綠豆氣味甘寒無毒

白豆




本草綱目孟詵曰白豆苗嫩者可作菜食生食亦妙汪  
穎曰浙東一種味甚勝用以作醬作腐極佳北方水白  
豆相似而不及也李時珍曰飯豆小豆之白者也亦有  
土黃色者豆大如綠豆而長四五月種之苗葉似赤小  
豆而畧尖可食莢亦似小豆一種蒙豆葉如大豆可作  
飯作腐亦其類也

又白豆氣味甘平無毒



欽定授時通考卷二十七



總校官庶吉士 臣侍 朝

校對官庶吉士 臣嚴 福

謄錄監生 臣陸學稼

謄錄監生 臣徐士俊

繪圖謄錄監生 臣董 椿



欽定四庫全書薈要

子部

欽定授時通考卷

二十八至  
三十

詳校官主事<sub>臣</sub>陳本



欽定四庫全書蒼要卷一萬六百九十一

子部

欽定授時通考卷二十八

穀種

豆二

魯豆

豌豆

野豌豆

蠶豆

豇豆

紫豇豆


藟豆

山藟豆

刀豆



魯豆 一名螢豆 一名螢菽 一名治螢 一名鹿豆 一  
名驢豆



本草綱目李時珍曰魯乃自生稻名也此豆原是野生故名今人亦種之於下地矣

又陳藏器曰魯豆生田野小而黑堪作醬爾雅戎菽一名驢豆古名瑩豆是也吳瑞曰魯豆即黑豆中最細者李時珍曰此即黑小豆也小科細粒霜後乃熟陳氏指為戎菽誤矣爾雅亦無此文戎菽乃胡豆瑩豆乃鹿豆並四月熟

又魯豆甘溫無毒

# 豌豆

一名戎菽 一名躡豆 一名留豆 一名國豆  
一名畢豆 一名回鶻豆 一名青斑豆 一名豌豆  
一名胡豆 一名麻累 一名青小豆 一名淮豆



遼志回鶻豆高二尺許直幹有葉無旁枝角長二寸每  
角止兩豆一根才六七角色黃味如粟

務本新書豌豆二三月種諸豆之中豌豆最為耐陳又  
收多熟早如近城郭摘豆角賣先可變物舊時農莊往  
往獻送此豆以為嘗新蓋一歲之中貴其先也又熟時  
少有人馬傷踐以此校之甚宜多種

農政全書豌豆生田野間其苗初搨地生後分莖又葉  
似苜蓿葉而細莖葉稍間開淡蔥白搨花結小角有豆



如踴豆狀味甜

本草綱目李時珍曰胡豆豌豆也其苗柔弱宛宛故得  
豌豆名種出胡戎嫩時青色老則斑麻故有胡戎青斑麻  
累諸名陳藏器拾遺雖有胡豆但云苗似豆生田野間  
米中往往有之然豌豆蠶豆皆有胡豆之名陳氏所云  
蓋豌豆也豌豆之粒小故米中有之爾雅戎菽謂之荏  
菽管子山戎出荏菽布之天下並註云即胡豆也唐史  
畢豆出自西戎回鶻地面張揖廣雅畢豆豌豆留豆也

別錄序例云丸藥如胡豆大者即青斑豆也孫思邈千金方云青小豆一名胡豆一名麻累鄴中記云石虎改胡豆為國豆此數說皆指豌豆也蓋古昔呼豌豆為胡豆今則蜀人專呼蠶豆為胡豆而豌豆名胡豆人不知矣又鄉人亦呼豌豆為淮豆蓋回鶻音相近也

又李時珍曰豌豆種出西胡今北土甚多八九月下種苗生柔弱如蔓有鬚葉似蒺藜葉兩兩對生嫩時可食三四月間開小花如蛾形淡紫色結莢長寸許子圓如

藥丸亦似甘草子出胡地者大如杏仁煮炒皆佳磨粉  
麵甚白細膩百穀之中最為先登

又豌豆氣味甘平無毒



野豌豆



農政全書野豌豆生田野中苗初就地拖秧而生後分  
生莖又苗長二尺餘葉似胡豆葉稍大又似苜蓿葉亦  
大開淡粉紫花結角似家豌豆角但秕小味苦

本草綱目李時珍曰野豌豆粒小不堪惟苗可茹名翹  
搖

蠶豆 一名胡豆



王楨農書蠶豆蠶時始熟故名百穀之中最為先登蒸  
煮皆可使食是用接新代飯充飽今山西人用豆多麥  
少磨麵可作餅餌而食

農政全書蠶豆今處處有之生田園中科苗高二尺許  
莖方其葉狀類黑豆葉而團長光澤紋脉堅直色似豌豆  
豆頗白莖葉稍間開白花結豆角其豆似豇豆而小色  
赤味甜

又蠶豆種花田中冬天不拔花結用以拒霜至清明後



拔之

又蠶豆八月初種臘月宜厚壅之此種極救農家之急  
且蝗所不食

本草綱目李時珍曰蠶豆莢狀如老蠶故名王禎農書  
謂其蠶時始熟故名亦通吳瑞本草以此為豌豆誤矣  
此豆種亦自西胡來雖與豌豆同名同時種而形性迥  
別太平御覽云張騫使外國得胡豆種歸指此也今蜀  
人呼此為胡豆而豌豆不復名胡豆矣

又李時珍曰蠶豆南土種之蜀中尤多八月下種冬生  
嫩苗可茹方莖中空葉狀如匙頭本圓末尖面綠背白  
柔厚一枝三葉二月開花如蛾狀紫白色又如豇豆花  
結角連綴如大豆頗似蠶形蜀人收其子以備荒歉  
又蠶豆氣味甘微辛平無毒

豇豆 一名降豆 一名蠶豆



農政全書豇豆今處處有之人家田園多種就地拖秧而生亦延籬落葉似赤小豆葉而極長梢開淡紫粉花結角長五七寸其豆味甘

又豇豆穀雨後種六月收子收來便種八月又收子

本草綱目李時珍曰豇豆紅色居多莢必雙生故有豇跽雙之名廣雅指為胡豆誤矣

又李時珍曰豇豆處處三四月種之一種蔓長丈餘一種蔓短其葉俱本大末尖嫩時可茹其花有紅白二色

莢有紅白紫赤斑駁數色長者至二尺嫩時充菜老則收子此豆可菜可果可穀備用最多乃豆中之上品

又豇豆氣味甘鹹平無毒李時珍曰豇豆開花結莢必兩兩並垂有習坎之義豆子微曲如腎形所謂豆為腎穀者宜以此當之



紫豇豆



農政全書紫豇豆人家園圃中種之莖葉與豇豆同但  
結角色紫長尺許味微甜



菡豆 一名鵲豆 一名蛾眉豆 一名沿籬豆



農政全書菹豆清明日下種以灰蓋之不宜土覆芽長  
分栽搭棚引上

又徐光啓曰以口向上種粒粒出若扁種十不出一蓋  
豆瓣重頂土不起故爛耳

本草綱目李時珍曰菹莢形扁也沿籬蔓衍也蛾眉象  
豆脊也

又陶弘景曰菹豆人家種之於籬垣其莢蒸食甚美蘇  
頌曰蔓延而上大葉細花花有紫白二色莢生花下其

實有黑白二種白者溫而黑者少冷入藥用白者黑者  
名鵲豆蓋以其黑間有白道如鵲羽也李時珍曰扁豆  
二月下種蔓生延纏葉大如杯團而有尖其花狀如小  
蛾有翅尾形其莢凡十餘樣或長或團或如龍爪虎爪  
或如猪耳刀鐮種種不同皆累累成枝白露後實更繁  
衍嫩時可充蔬食茶料老則收子煮食子有白黑赤斑  
四色一種莢硬不堪食惟豆子粗圓而色白可入藥  
又菹豆氣味甘微溫無毒


又李時珍曰硬殼白扁豆其子充實白而微黃其氣腥  
香其性溫平得乎中和脾之穀也其軟殼及黑鵲色者  
其性微涼可供食亦調脾胃

山 菀 豆



農政全書山藟豆生田野中小科苗高一尺許葉似蒺藜葉微大根葉比苜蓿葉頗長又似初生豌豆葉開黃花結小扁角兒味甜

刀豆  
一名挾劍豆



酉陽雜俎挾劍豆樂浪東有融澤澤中生豆莢形似人挾劍橫斜而生

農政全書刀豆處處有之人家園籬邊多種之苗葉似豇豆葉肥大開淡粉紅花結角如皂角狀而長其形似屠刀樣故以名之味甜微淡

又刀豆清明日鋤地作穴每穴下種一粒以灰蓋之只用水澆待芽出則澆以糞水蔓長搭棚引上

本草綱目李時珍曰刀豆以莢形命名也



又汪穎曰刀豆長尺許可入醬用李時珍曰刀豆人多種之三月下種蔓生引一二丈葉如豇豆葉而稍長大五六月開紫花如蛾形結莢長者近尺微似皂角扁而劔脊三稜宛然嫩時煮食醬食蜜煎皆佳老則收子子大如拇指頭淡紅色同猪肉雞肉煎食尤美又刀豆氣味甘平無毒

欽定授時通考卷二十八

欽定四庫全書薈要卷一萬六百九十二

子部

欽定授時通考卷二十九

穀種

豆三

黎豆

山藪豆

山黑豆

苦馬豆

鹿藿

踴豆

回回豆



黎豆

一名攝  
一名獵沙  
一名虎鼎  
一名狸豆  
一名虎豆  
一名櫟攝  
一名



爾雅攝虎梟

注今虎豆纏蔓林樹而生莢有毛刺今江東呼為櫛  
栳疏櫛一名虎梟郭云今虎豆纏蔓林樹而生莢有  
刺今江東呼為櫛或曰葛類也子如菜豆而葉大

本草綱目陳藏器曰豆子作狸首文故名李時珍曰黎  
亦黑色也此豆莢老則黑色有毛露筋如虎狸指爪其  
子亦有點如虎狸之斑煮之汁黑故有諸名又曰黎豆  
生江南蔓如葛子如皂莢子作狸首文人炒食之別無

功用陶氏註蚺蛇膽云如藜豆者即此也爾雅云諸慮

一名虎涉又註鼈根云苗如豆爾雅攝虎鼈郭璞註云

江東呼鼈為藤似葛而粗大纏蔓林樹莢有毛刺一名

豆菟今虎豆也千歲鼈是矣李時珍曰爾雅虎鼈即藜

豆也古人謂藤為鼈後人訛鼈為狸矣爾雅山鼈虎鼈

原是二種陳氏合而為一謂諸慮一名虎涉又以為千

歲鼈並誤矣千歲鼈見草部狸豆野生山人亦有種之

者三月下種生蔓其葉如豉豆葉但文理偏斜六七月

開花成簇紫色狀如扁豆花一枝結莢十餘長三四寸  
大如拇指有白茸毛老則黑而露筋宛如乾熊指爪之  
狀其子大如刀豆子淡紫色有斑點如狸文煮去黑汁  
同豬雞肉再煮食味乃佳

又黎豆氣味甘微苦溫有小毒多食令人悶



山 薰 豆



農政全書山鰲豆一名山豌豆生密縣山野中苗高尺許其莖窠面劒脊葉似竹葉而齊短兩兩對生開淡紫花結小角兒其豆扁如踔豆味甜

山黑豆


欽定四庫全書

通雅  
卷二十九



農政全書山黑豆生密縣山野中苗似家黑豆每一葉攢生一處居中大葉如菜豆葉傍兩葉似黑豆葉微圓開小粉紅花結角比家黑豆角極瘦小其豆亦極細小味苦

苦馬豆



農政全書苦馬豆生延津縣郊野中在處有之苗高二尺許莖似黃芪苗莖上有細毛葉似胡豆葉微小又似蒺藜葉却大枝葉間開紅紫花結殼如拇指頂半頂間多虛俗呼為羊尿胞內有子如麻子大茶褐色子葉俱味苦



鹿藿 一名藺 一名鹿藿 一名鹿豆 一名豈豆 一名  
野綠豆



爾雅藟鹿藿其實菹

注今鹿豆也葉似大豆根黃而香蔓延生疏藟一名鹿藿其實名菹郭云今鹿豆也葉似大豆根黃而香蔓延生本草云味苦唐本註云此草所在有之苗似豌豆有蔓而長大人取以為菜亦微有豆氣名為鹿豆也

本草綱目李時珍曰豆葉曰藿鹿喜食之故名俗呼豈豆豈鹿音相近也王盤野菜譜作野綠豆爾雅云藟音



卷鹿藿也其實菔音紐即此又別錄曰鹿藿生汶山山

谷陶弘景曰方藥不用人亦無識者但葛苗一名鹿藿

蘇恭曰此草所在有之苗似豌豆而引蔓長粗人採為

菜亦微有豆氣山人名為鹿豆韓保昇曰鹿豆可生噉

五月六月採苗日乾之郭璞註爾雅云鹿豆葉似大豆

蔓延生根黃而香是矣李時珍曰鹿豆即野綠豆又名

螢豆多生麥地田野中苗葉似綠豆而小引蔓生生熟

皆可食三月開淡粉紅花結小莢其子大如椒子黑色

可煮食或磨麩作餅蒸食  
又鹿藿氣味苦平無毒

豆踴



農政全書踔豆生平野中北地處處有之莖蔓延附草  
木上葉似黑豆葉而窄小微尖開淡粉紫花結小角其  
豆似黑豆形極小味甘

回回豆



農政全書回回豆又名那合豆生田野中莖青葉似蒺藜葉又似初生嫩皂莢而有細鋸齒開五瓣淡紫花如蒺藜花樣結角如杏仁樣而肥豆如牽牛子微大味甘

各土豆產

附

直省志書宛平縣物產豆有青白黃黑赤菜紅藜菀菜扁龍瓜刀羊角蠶等種 香河縣物產猪食豆羅裙帶豆 昌平州物產菜豆有官綠油綠摘綠拔綠四種黑豆有雌有雄雌者長大而暗雄者圓小而明白藟豆凡

十餘種或長或圓或如龍爪虎爪或如猪耳刀鏟大豆

有綠褐烏三種小豆有赤白二種 清苑縣土產菽有

批虱有猫眼 歷城縣方產菜豆紅豆豇豆黑豆豌豆

大豆有青黑作豉用黃豆小豆赤白黎黑四種扁豆俗

名蒼豆二種或青而長或白而肥蠶豆形似蠶蠶月生

金豆長豆角刀豆 鄒平縣物產豆黃黑菜赤白蠶豆

數種扁豆豇豆連莢可食刀豆僅可醬食 臨邑縣物

產有菽江南豆月豆 萊蕪縣物產豆有黑黃綠扁醬

青豇赤八種秋熟豌豆一種夏熟又有赤小豆白小豆黎  
小豆扒山豆之類眉豆有數種刀豆形如刀蠶豆長豆  
角有數種 陽信縣物產菽紅白黃黑為用各異而綠  
豆最佳豆角有長扁各數種可熟食 霑化縣物產豆  
之品大黃豆青黃豆天鵝蛋大黑豆小黑豆牛腰齊皮  
狐腿老鼠眼蘆花白明菜豆毛菜豆東北風紅摘豆茶  
豆小豆扁豆 曹縣物產豆夏熟者曰豌豆匾豆秋熟  
者曰豇豆黃豆而黃亦有數種曰青豆青亦有數種曰



黑豆黑亦有數種又曰金豆玉豆黎豆菜豆又有赤小  
豆白小豆綠小豆又有扒山豆管豆又有一種大黑豆  
鉅野縣物產豆黃豆黑豆青豆茶豆豉豆紅白黑三  
種菜豆蠶豆小豆紅白黑三種菜豆匾豆豌豆管豆眉  
豆凡十八種汶上縣物產豆黃豆青豆黑豆大小二  
種茶豆豉豆紅白黑三種小豆紅白黑三種菜豆匾豆  
豌豆管豆凡十八種陽穀縣物產黃豆黑豆綠豆白  
薑豆紅薑豆黑薑豆白小豆紅小豆黑小豆彎豆梅豆

茶豆扁豆刀豆蠶豆豆角 濮州土產豆有菜黃赤白

青茶眉刀裙帶龍爪羊角之屬 范縣物產豆有十二

菜豆黃豆黑豆茶豆紅豇豆白豇豆豌豆匾豆踔豆青

豆紅小豆白小豆菜豆有八眉豆蠶豆龍爪豆羊角豆

白不老羅裙帶仙鶴頂刀豆 觀城縣物產豆花黑黃

三種 日照縣物產豆其種不一大者青黃黑三色小

者赤綠二色又有豌豆龍爪刀鞘裙帶白穉豆 黃縣

物產豆有纏絲豆紅黃豆紫羅帶豆 福山縣物產豆

黃豆青黃豆纏絲豆鐵黑豆小黑豆香豆俗名雀卵綠

豆白小豆赤小豆花小豆玉小豆兔脚豆 招遠縣物

產大豆有黑青黃白綠斑數色而黃者為多綠豆有明

綠黑綠東北風之類豆以風名遇東北風則易壞故名

之豇豆有紅白花三種 定襄縣物產豆黃黑菜豌豆

薑小連刀梅箸纏絲 太平縣物產豆多種其形色大

小間雜不等菜豆角有龍爪羅裙帶葉裏藏數種 臨

晉縣物產黑豆大小二種緊黑者為雄豆入藥良黃豆

亦有大小二種綠豆有官綠油綠二種早種者名摘角  
綠遲種者名拔角綠豌豆菹豆一名沿籬豆一名蛾眉  
豆又名茶豆豇豆有二種一種蔓長丈餘須懸架則蕃  
一種蔓短鋪地結莢嫩時充菜土人呼為菜角又大赤  
豆土人亦呼豇豆 平陸縣土產菽之名色不一惟黃  
豆黑豆之大者可以為豉豇豆扁豆則可為菜他如菜  
黃青紅黑白豌豆龍眼羊眼龍爪麥蘆小豆皆可  
日用 絳州物產菽之屬纏絲豆人面豆龍爪豆紫羅

帶白不老 祥符縣物產紅豇豆白豇豆菜豆黑豇豆

花豇豆扁豆青豆黑豆銅皮豆紅小豆豌豆黑小豆黃

豆花豆白小豆蠶小豆綠豆 鄆陵縣土產豆有青白

黃紅黑茶褐等色天鵝蛋老鴉眼花斑雞虱羊眼等名

然大青豆及羊眼黑豆堪作豉豇豆曰羅裙帶白不老

者堪為菜紅小豆堪入藥餘皆平常 延津縣物產菽

有大黃大青大紫大黑扁黑扁白菜豆青豌豆白豌豆眼

紫眼羊眼等種淮南王以豆為乳脂今豆膏豆粉豆腐

較他處尤佳得淮南遺法 禹州土產花斑石豆雞虱

豆春不老虎爪豆 葉縣土產紫豆紅滾豆龍爪豆瑪

瑙豆 遂平縣土產豆屬菀豆紅豆羊眼豆雞虱豆龍

爪豆紫羅帶香子豆鴛眉豆紅米豆豬腦豆朴姜豆

西鄉縣土產黃豆黑豆冰豆青豆茶褐豆羊眼豆赤豆

菜豆麻小豆白小豆臨秋豆白扇豆 六合縣物產菽

之屬黑大豆青大豆有透骨青者用同黃豆黃大豆赤

小豆黑小豆綠豆圓小者佳白豆一名飯豆豌豆香珠

豆色紫小者尤香佛手豆白果豆粒大而香同白果羊

眼豆蠶豆一名胡豆豇豆匾豆一名沿籬豆黑白二種

刀豆一名挾劍豆 貴池縣土宜豆有麩條蛾眉魴魮

富郎冲天角豆茶豆紫豆 鹽城縣物產菽有茶豆葶

薺豆有青黃紫赤黑白綠紅數色最早熟者有六十日

雁來枯之類 揚州府物產菽有大黃大青大紫大黑

大褐鴨卵青白扁黑扁白小赤小小紅菜豆樓子綠摘

角綠鵪鶉斑赤江白江摘角江青豌白豌白眼紫眼羊

眼雁來枯杪社黃半夏黃佛指 通州物產豆粒有大

小色有青黃紫黑白之別名有茶青扁蒲麻皮雞趾牛  
莊僧衣香珠蓮心烏眼沉香白果之不同 吳縣物產

菽之屬縹豆又名僧衣豆斑豆蠟眼豆羊眼豆香珠豆  
色紫小而香賊懊惱極小雲南豆似白扁豆大而長

崑山縣土產中秋豆雁來紅佛手豆瑪瑙豆 常熟縣

物產紫羅豆有青黑花紋河陽青早熟西鄉高田種之  
豇青黑色長角十八豇蔓生俗名裙帶豆 嘉定縣物



產大黑豆凡豆之屬皆出嘉定者佳而黑豆為之魁他

邑爭購作種豌豆有大小二種四鄉俱有之大有如指

頂者其味絕美他邑所出甚稀形小性硬迥不如也土

人或種之花田中冬天不拔花其用以拒霜至清明後

始拔豆隨熟 太倉州物產豆有黃青黑三種黃曰蘇

州黃員珠黃烏眼黃水白豆扇子黃高脚黃青曰大青

小青茨菰青肉裏青黑曰大黑小黑六月烏雜色者曰

僧衣豆香珠豆羊眼豆最大者曰嚇殺人小曰賊歎氣

州岡自種豆收亦薄惟東土所出獨壯美絕勝他邑蠶  
豆出雙鳳法輪寺前者尤佳自雙鳳至南門亦據勝大  
有如指頂者他邑僅三之一性亦粗硬 上海縣物產

豆有南京黃以種自秣陵故名隨稻黃九月中方香綻  
可食六月豆種最早六月即可採食砂仁豆色紫味香  
豆中上品黑豆赤豆有大小二種米赤豆較赤豆略小  
可和米炊飯菜豆水白豆青豆色青七月即熟白香圓  
白豆之最大者以色味形得名茅柴赤凡豆不宜肥土

土肥則莢稀此種不用耘茅草之地叢生尤盛故名紫羅豆色紫粒小俗謂紫香圓又一種青黑花紋名僧衣豆龍爪豆江豆刀豆豌豆蠶豆白菹豆 江陰縣物產黃豆名珍珠黃烏眼黃者為上青豆名白果青最佳靖江縣食貨菽之屬其產於邑者粒有大小色有青黃紫白黑之別青色者粒大味美曰扁蒲曰膠州青骨裏青豹腰青粒圓多實曰圓珠翠碧粒小曰茶青其淡碧而味色絕美者曰白果六月拔八月枯烏眼黃粒有黑

眼水面白粒大品佳麻皮黃牛墾莊兔子圓雞趾黃獐  
皮黃皆黃色之屬也六月白搶場白白果豆皆白色之  
屬也色紫者僧衣香珠蓮心三種並妙烏香珠大黑子  
黑之屬外有五色雜而宜飯者俗呼赤豆其粒細而長  
蔓生者曰蠅眼早收者曰麻熟 丹徒縣物產豆有大  
小豆色有青黃黑紫褐名有雁來青雁來枯癡黃半夏  
黃鐵殼黃香珠茶褐葶薺白果牛啃莊早綿青烏豆水  
白豆馬鞍豆小豆亦有赤豆綠豆小黑豆白豆龍爪豆

飯豆紅黑豆豇豆佛指豆十六粒豆蠶豆黑白扁豆刀豆  
丹陽縣物產豆黃豆以東鄉沼漕渠者為佳 石門

縣物產豆有梅豆含豆香珠豆棋花豆裙帶豆一茶匙  
眉莢豆僧衣豆 桐鄉縣物產有舜隆豆 瑞安縣物

產豆有六月烏六月白八月白雲豆三收豆珍珠豆苜  
菘豆 寧州土產軟莢豆錢豆米豆道士冠腳魚卵

東鄉縣物產豆有六月爆泥豆花豆虎爪豆 瀘溪縣  
物產菽之屬有沉香豆秋後種諸田間羊眼豆虎爪豆

羊鬚豆俱以形似六月爆豆之最早者 龍南縣物產

菽有六月黃八月黃 蒲圻縣物產菽之類有兔兒圓

羅裙帶道人冠 咸寧縣物產伴粟豆青皮豆雁來紅

龍爪豆猪牙豆元修豆 羅田縣物產菽類有羅裙帶

雁來紅羊眼豆蛾眉豆巴山豆西山豆六月報猪牙豆

蜜蜂豆龍爪豆茶柯豆青皮豆高脚黃兔兒丸雞婆豆

飯豆白殼豆泥豆鴉鵲豆 德安府物產菽豆曰摘菽

曰藤菽曰一朶雲曰蔓草菽曰穀椿菽黃豆有黃色青

色黑色茶花色數種更有名纏絲者骨裏青者六月爆

者楊雀卵者統謂之黃豆 寧鄉縣物產豆種十有一

曰豆角即上芭豆一名紅豆又名羅裙帶刀豆膀皮豆  
一名蠶豆又名白扁豆八月白以上皆藤生摘岡菜豆

懶人豆一名爛蒿薦秋江豆黃豆黑豆飯豆以上皆枝

實 邵陽縣食貨菽之屬黃豆菜豆六月黃八月白水

白豆皂角豆羊眼豆茶豆粟槁豆飯豆江豆袞豆冬豆

蠶豆硃砂豆青皮豆刀靶豆蛾眉豆龍爪豆裙帶豆泥

豆線豆扁豆烏豆棕豆 永明縣土產菽之品硃砂豆

羊眼豆大松豆小黃豆雪豆韶豆大青豆黑茶豆黑冷

豆 泉州府物產菽之屬有紅豆春豆九月豆騎草豆

畚豆白卯豆六月綱豆 建寧縣物產花羅豆大烏豆

寒露豆虎爪豆六月黃上樹豆田豆岡豆 惠來縣物

產豆之屬有蕉子虎爪九月黃九月白六月黃六月烏

十八粒壓早 高明縣土產豆有樹豆生數尺高四季

熟豬牙豆靴嘴豆有刀鞘豆花眉豆又五月收豆 廣



西府物產豆之屬南豆灣豆架豆靴豆老鼠豆黃花豆  
白早豆羊眼豆寸金豆

欽定授時通考卷二十九

欽定四庫全書薈要卷一萬六百九十三

子部

欽定授時通考卷三十

穀種

麻

麻

大麻

沙蓬米

豆麻


蓖麻

稗 穆子 根 蔕 東廬

薏苡仁



脂麻苗



詩經王風丘中有麻

疏言丘中境埆之處所以得有麻者乃留氏子嗟之所治也由子嗟教民農業使得有之集傳麻穀名子可食皮可績為布者大全本草曰一名麻勃此麻上花勃勃者麻子味甘平無毒園圓所蒔今人作布及履用之

齊風藝麻如之何衡從其畝

注欲樹麻者必先縱橫經治其田畝

豳風九月叔苴

疏苴麻之有實者也叔苴謂拾取麻實以供食也

大雅麻麥蒙幪

注茂密也

禮記月令孟秋之月天子食麻與犬

又仲秋之月天子以犬嘗麻先薦寢廟

注麻始熟也

周禮天官朝事之遵其實麩黃

注黃實也鄭司農云麻曰黃

儀禮有司徹主司取籩於房體黃坐設於豆西

注黃熬臬實也

爾雅麩臬實

注禮記曰苴麻之有麩疏臬麻也麩者即麻子名故云麩臬實也

又臬麻

注別二名疏麻一名臬故注云別二名禹貢青州云



厥貢岱畎絲枲是也

又苧麻母

注苧麻盛子者疏一名苧一名麻母

淮南子汾水濛濁而宜麻

齊民要術漢書張騫外國得胡麻今俗人呼為烏麻者非也廣雅曰狗蟲勝茄胡麻也本草經曰青蘘一名巨勝今世有白胡麻八角胡麻白者油多

爾雅翼麻實既可以養人而其縷又可以為布其利最

廣然麻之屬總曰麻別而言之則有實者別名苴無實者別名梟子夏喪服傳曰苴經者麻之有蕢者也牡麻者梟麻也蕢即實也牡即無實之名也然此類亦通名麻梟故或以蕢為梟實蓋假借言之耳麻實又有文理故屬金為西方之穀明堂月令秋則食麻與夫秋氣既涼又向寒無害故食當方之穀牲而至仲秋則又以犬嘗麻先薦寢廟也若豳風則九月菽苴蓋食農夫者不嫌於晚耳麻實既謂之蕢故古者朝事之遵熬麻麥以

實之謂之體蕢又麻於植物中最為多子故詩稱桃之  
天天有蕢其實言桃花色既盛又結子之多如麻子然  
以况室家之相宜而其繼續繁衍者如此說文又云葩  
泉實或作廢則音雖異而意同後世說本草者或以廢  
為牡麻之華則與詩雅所說大異又胡麻亦有實本生  
大宛一名油麻一名狗蟲一名方莖純黑者名巨勝亦  
曰一葉兩莢為巨勝或曰莖圓為胡麻莖方為巨勝道  
家以為飯陶隱居言八穀之中胡麻最為良以詩黍稷

稻粱禾麻菽麥為八種而引董仲舒云禾是粟苗麻是  
胡麻按胡麻大宛之種張騫得之以歸詩人所稱豈應  
近捨中國之苴而遠述大宛之巨勝此說非是又以其  
胡物而細故別為中國之麻為漢麻亦曰大麻

本草綱目李時珍曰按沈存中筆談云胡麻即今油麻  
更無他說古者中國只有大麻其實為蕢漢使張騫始  
自大宛得油麻種來故名胡麻以別中國之大麻也寇  
宗奭衍義亦據此釋胡麻故今并入油麻焉巨勝即胡

麻之角巨如方勝者非二物也方莖以莖名狗蝨以形  
名油麻脂麻謂其多油脂也按張揖廣雅胡麻一名藤  
弘弘亦巨也別錄一名鴻藏乃藤弘之誤也又杜寶拾  
遺記云隋大業四年改胡麻曰交麻

又別錄曰胡麻一名巨勝生上黨川澤秋採之青蘘巨  
勝苗也生中原川谷陶弘景曰胡麻八穀之中惟此最  
良純黑者為巨勝巨者大也本生大宛故名胡麻又以  
莖方者為巨勝圓者為胡麻蘇恭曰其角作八稜者為

巨勝四稜者為胡麻都以烏者為良白者為劣孟詵云  
沃地種者八稜山田種者四稜土地有異工力則同蘇  
頌曰胡麻處處種之稀復野生苗硬如麻而葉圓銳光  
澤嫩時可作蔬道家多食之本經謂胡麻一名巨勝陶  
弘景以莖之方圓分別蘇恭以角稜多少分別仙方有  
服胡麻巨勝二法功用小別是皆以為二物矣或云即  
今油麻本生胡中形體類麻故名胡麻八穀之中最為  
大勝故云巨勝乃一物二名如此則是一物而有二種

如天雄附子之類故葛洪云胡麻中有一葉兩尖者為  
巨勝別錄序例云細麻即胡麻也形扁扁爾其莖方者  
為巨勝也今人所用胡麻之葉如荏而狹尖莖高四五  
尺黃花生子成房如胡麻角而小嫩時可食甚甘滑利  
大腸皮亦可作布類大麻色黃而脆俗亦謂之黃麻其  
實黑色如韭子而粒細味苦如膽杵末略無膏油其說  
各異此乃服食家要藥乃爾差誤豈復得效也寇宗奭  
曰胡麻諸說參差不一止是今人脂麻更無他義以其

種來自大宛故名胡麻今胡地所出者皆肥大其紋鵲  
其色紫黑取油亦多嘉祐本草白油麻與此乃一物但  
以色言之比胡地之麻差淡不全白爾今人通呼脂麻  
李時珍曰胡麻即脂麻也有遲早二種黑白赤三色其  
莖皆方秋開白花亦有帶紫艷者節節結角長者寸許  
有四稜六稜者房小而子少七稜八稜者房大而子多  
皆隨土地肥瘠而然蘇恭以四稜為胡麻八稜為巨勝  
正謂其房勝巨大也其莖高者三四尺有一莖獨上者



角纏而子少有開枝四散者角繁而子多皆因苗之稀稠而然也其葉有本團而未銳者有本團而未分三了如鴨掌形者葛洪謂一葉兩尖為巨勝者指此蓋不知烏麻白麻皆有二種葉也按本經胡麻一名巨勝吳普本草一名方莖抱朴子及五符經並云巨勝一名胡麻其說甚明至陶弘景始分莖之方圓雷斅又以赤麻為巨勝謂烏麻非胡麻嘉祐本草復分白油麻以別胡麻并不知巨勝即胡麻中了葉巨勝而子肥者故承誤啓

疑如此惟孟詵謂四稜八稜為土地肥瘠寇宗奭據沈  
存中之說斷然以脂麻為胡麻足以證諸家之誤矣又  
賈思勰齊民要術種收胡麻法即今種收脂麻之法則  
其為一物尤為可據今市肆間因莖分方圓之說遂以  
茺蔚子偽為巨勝以黃麻子及大藜子偽為胡麻誤而  
又誤矣茺蔚子長一分許有三稜黃麻子黑如細韭子  
味苦大藜子狀如壁蝨及酸棗核仁味辛甘並無脂油  
不可不辨梁簡文帝勸醫文有云世誤以灰滌菜子為

胡麻則胡麻之訛其來久矣

又胡麻氣味甘平無毒

又白油麻氣甘大寒無毒李時珍曰胡麻取油以白者為勝服食以黑者為良

天工開物凡麻可粒可油惟火麻胡麻二種胡麻即脂麻相傳西漢始自大宛來古者以麻為五穀之一若專以火麻當之豈有當哉竊意詩書五穀之麻或其種已滅或即菽粟中之別種而漸訛其名號皆未可知也今

胡麻味美而功高即以冠百穀不為過火麻子粒壓油無多皮為布疏惡其值幾何胡麻數龠充腸移時不餒粗餌飴錫得粘其粒味高而品貴其為油也髮得之而澤腹得之而膏腥羶得之而芳毒厲得之而解農家能廣植厚實可勝言哉種胡麻法或治畦圃或壟田畝土碎草淨之極然後以地灰微溼拌勻麻子而撒種之早者三月種遲者不出大暑前早種者花實亦待中秋乃結耨草之功惟鋤是視其色有黑白赤三者其結角長

寸許有四稜者房小而子少八稜者房大而子多皆因肥瘠所致非種性也收子榨油每石得四十觔餘其枯用以肥田若饑荒之年則留供人食



# 大麻

一名火麻 一名漢麻 一名黃麻 雄者名臬麻  
一名牡麻 雌者名苴麻 一名葶麻 花名麻勃



羣芳譜大麻莖高五六尺枝葉扶疎葉狹而長狀如益  
母草葉一枝七葉或九葉五六月開細黃花成穗隨即  
結子似蘇子而大剥去皮作麻績之可為布

本草綱目李時珍曰麻從兩朮在广下象屋下派麻之  
形也朮音派广音儼餘見下註云漢麻者以別胡麻也  
又本經曰麻蕒一名麻勃麻花上勃勃者七月七日采  
之良麻子九月採入土者損人生太山川谷陶弘景曰  
麻蕒即牡麻牡麻則無實今人作布及履蘇恭曰蕒即



麻實非花也爾雅云蕒稟實儀禮云苴麻之有蕒者註云有子之麻為苴皆謂子也陶以蕒為麻勃謂勃勃然如花者復重出麻子誤矣既以蕒為米穀上品花豈堪食乎陳藏器曰麻子早春種為春麻子小而有毒晚春種為秋麻子入藥佳壓油可以油物寇宗奭曰麻子海東毛羅島來者大如蓮實最勝其次出上郡北地者大如豆南地者子小蘇頌曰麻子處處種之績其皮可以為布農家擇其子之有斑黑文者謂之雌麻種之則結

子繁他子則不然也本經麻蕒麻子所主相同而麻花  
非所食之物蘇恭之論似當矣然本草朱字云麻蕒味  
辛麻子味甘又似二物疑本草與爾雅禮記稱謂有不  
同者又藥性論用麻花云味苦主諸風然則蕒也子也  
花也其三物乎李時珍曰大麻即今火麻亦曰黃麻處  
處種之剝麻收子有雌有雄雄者為臬雌者為苴大科  
如油麻葉狹而長狀如益母草葉一枝七葉或九葉五  
六月開細黃花成穗隨即結實大如胡荽子可取油剝

其皮作麻其穢白而有稜輕虛可為燭心齊民要術云  
麻子放勃時拔去雄者若未放勃先拔之則不成子也  
其子黑而重可搗治為燭即此也本經有麻蕒麻子二  
條謂蕒即麻勃謂麻子入土者殺人蘇恭謂蕒是麻子  
非花也蘇頌謂蕒子花為三物疑而不決謹按吳普本  
草云麻勃一名麻花味辛無毒麻藍一名麻蕒一名青  
葛味辛甘有毒麻葉有毒麻子中仁無毒據此說則麻  
勃是花麻蕒是實麻仁是實中仁也普三國時人去古

未遠說甚分明神農本經以花為蕒皆傳寫脫誤耳陶氏及唐宋諸家皆不考究而臆度疑似可謂疎矣今依吳氏改正

又麻勃吳普曰一名麻花李時珍曰觀齊民要術有放勃時拔去雄者之文則勃為花明矣

又麻勃氣味辛溫無毒

又麻蕒吳普曰一名麻藍一名青葛李時珍曰此當是麻子連殼者故周禮朝事之籩供蕒月令食麻與犬麻

可食蕒可供稍有分別殼有毒而仁無毒也  
又麻蕒氣味辛平有毒



沙蓬米



聖祖御製幾暇格物編沙蓬米凡沙地皆有之鄂爾多斯所產尤多枝葉叢生如蓬米似胡麻而小性暖益脾胃易於消化好吐者食之多有益作為粥滑膩可食或為米可充餅餌茶湯之需向來食之者少自朕試用之知其宜人今取之者衆矣



亞麻

一名鷓麻 一名壁蝨胡麻



本草綱目蘇頌曰亞麻子出兗州威勝軍苗葉俱青花  
白色八月上旬採其實用李時珍曰今陝西人亦種之  
即壁蝨胡麻也其實亦可榨油點燈氣惡不堪食其莖  
穗頗似茺蔚子不同

又亞麻子氣味甘微溫無毒

蓖麻

一名博落迴



本草綱目蘇頌曰蓖麻葉似大麻子形宛如牛蟬故名  
李時珍曰蓖亦作蠅牛蟲也其子有麻點故名

又蘇恭曰此人間所種者葉似大麻葉而甚大結子如  
牛蟬今胡中來者莖赤高丈餘子大如皂莢核用之亦  
良韓保昇曰今在處有之夏生苗葉似葎草而大厚莖  
赤有節如甘蔗高丈餘秋生細花隨便結實殼上有刺  
狀類巴豆青黃斑褐夏采莖葉秋采實冬采根曬乾用  
李時珍曰其莖有赤有白中空其葉大如瓠葉每葉凡

五尖夏秋間椹裏抽出花穗累累黃色每枝結實數十  
顆上有刺攢簇如蝟毛而軟凡三四子合成一顆枯時  
劈開狀如巴豆殼內有子大如豆殼有斑點狀如牛虻  
再去斑殼中有仁嬌白如續隨子仁有油可作印色及  
油紙子無刺者良有刺者毒

又蓖麻氣味甘辛平有小毒



稗  
一名烏禾



爾雅穉矣

注穉似稗布地生穢草疏穉一名矣似稗之穢草也  
布生於地莊子曰道在穉稗是亦有米細小又曰若  
穉米之在太倉是也

六書故稗葉純似稻節間無毛實似蕢害稼

爾雅翼孟子曰五穀者種之美者也苟為不熟不如穉  
稗穉與稗二物也皆有米而細小莊子曰道在穉稗言  
比於穀則微細而不精道亦在焉又曰若穉之在太倉



亦言小也爾雅蓊莢釋曰蓊一名莢似稗之穢草布生於地而稗則上下澤中故古詩曰蒲稗相因依汜勝之書曰稗水旱無不熟之時又特滋盛易得蕪穢良田畝得二三十斛宜種之以備凶年

又稗中有米熟時可擣取之炊之不減粢米又可釀作酒武帝時令典農種之一頃收二千斛斛得米三升大儉可磨食之蓋稗遇水旱無不熟而五穀則有熟不熟之時以此不熟方之於稗則為不如耳草之似穀可養

人者甚多博物志稱蒺藜草實食之如大麥本草稱東廡  
可為飯又蔞米可為飯四月熟久食不饑狼尾草子作  
黍食之令人不饑又蒯草子亦堪食如杭米又蓬草子  
作飯無異杭米儉年食之此皆五穀之外可以接糧者  
故附著之

本草綱目李時珍曰稗乃禾之卑賤者也故字從卑

又陶弘景曰稗子亦可食又有烏禾生野中如稗荒年  
可代糧而殺蟲煮以沃地螻蛄皆死陳藏器曰稗有二

種一種黃白色一種紫黑色紫黑色者似芑有毛北人呼為烏禾

又稗米氣味辛甘苦微寒無毒

農政全書稗子有二種水稗生水田邊旱稗生田野中今處處有之苗葉似稊子葉色深綠脚葉頗帶紫色結子如黍粒大茶褐色味微苦性微溫

又稗多收能水旱可救儉孟子言五穀不熟不如蕘稗淮南所謂小利者皆以此且稗稗一畝可當稻稗二畝

其價亦當米一石宜擇嘉種於下田藝之歲歲無絕倘  
遇災年便得廣植勝於流移捃拾遠矣

穆子

附

一名龍爪粟一名鴨爪稗

農政全書穆子生水田中及下濕地內苗葉似稻但差  
短梢頭結穗彷彿稗子穗其子如黍粒大茶褐色味甘  
本草綱目李時珍曰穆乃不黏之稱也又不實之貌也  
龍爪鴨爪象其穗岐之形

又李時珍曰穆子山東河南亦五月種之苗如芡黍八

九月抽莖有三稜如水中蘆草之莖開細花簇簇結穗如粟穗而分數歧如鷹爪之狀內有細子如黍粒而細赤色其稃甚薄其味麤澀又糝子氣味甘澁無毒

稂附

詩曹風冽彼下泉浸彼苞稂

爾雅稂童梁

注稂莠類也疏今人謂之宿田翁或謂之守田也

說文稂禾秀之穗生而不成者謂之董節

爾雅翼稂惡草與禾相雜

本草綱目稂一名狼尾草陳藏器曰生澤地似茅作穗  
廣志云子可作黍食李時珍曰莖葉穗粒並如粟而穗  
色紫黃有毛荒年亦可採食

苧草

附

爾雅皇守田

注似燕麥子如雕胡米可食生廢田中一名守氣

爾雅翼菑米可為飯生水田中苗子似小麥而小四月  
熟久食不饑爾雅所謂皇守田者也

東廡

附

一名梁禾

廣志東廡粒如葵子似蓬草色青黑十一月熟出幽涼  
并烏丸地

本草綱目陳藏器曰東廡生河西苗似蓬子似葵九月  
十月熟可為飯食河西人語曰貸我東廡償爾田梁李  
時珍曰相如賦東廡雕胡即此魏書云烏丸地宜東廡

似糶可作白酒又廣志云梁禾蔓生其子如葵子其米粉白可作饘粥六月種九月收牛食之尤肥此亦一穀似東廩者也

又東廩子氣味甘平無毒



# 薏苡仁

一名解蠱  
一名薏珠  
一名苞實  
一名西番  
一名蜀米  
一名回回  
一名草珠  
兒一名  
韓珠  
一名糞米  
苗名屋茨





羣芳譜薏苡處處有之交趾者子最大出真定者佳今多用梁漢者氣劣於真定春生苗莖高三四尺葉如黍葉開紅白花作穗五六月結實青白色形如珠子而稍長故呼薏珠子取用以顆小色青味甘黏牙者良形尖而殼薄米白如糯米此真薏苡也可粥可麩可同米釀酒

本草綱目李時珍曰薏苡名義未詳其葉似蠶實葉而解散又似芑黍之苗故有解蠶芑實之名藟米乃其堅

硬者有齧強之意苗名屋茨救荒本草名回回米又呼  
西番蜀秫俗名草珠兒


又雷敷曰凡使勿用糲米顆大無味時人呼為粳糲米  
也薏苡仁顆小色青味甘咬著人齒也李時珍曰薏苡  
人多種之二三月宿根自生葉如初生芑茅五六月抽  
莖開花結實有二種一種黏牙者尖而殼薄即薏苡也  
其米白色如糯米可作粥飯及磨麩食亦可同米釀酒  
一種圓而殼厚堅硬者即菩提子也其米少即粳糲也

但可穿作念經數珠故人亦呼為念珠云其根並白色  
大如匙柄糾結而味甘

又薏苡氣味甘微寒無毒



欽定授時通考卷三十



總校官庶吉士 臣侍 朝

校對官庶吉士 臣嚴 福

謄錄監生 臣徐士俊

繪圖謄錄監生 臣王玉海